

**MAHINUNGDANONG MGA PAMAHAYAG
ALANG SA 2022 THANKSGIVING CONFERENCE**

**Sa tibuok uniberso ang bugtong-talagsaong panalangin
mao ang Tulo-usang Dios nga nagpaambit sa Iyang Kaugalingon
diha sa Iyang Diosnong Trinidad nganhi nato
sa pagpahimulos nato sa nagpuyo-sa-sulod ug awtomatikong balaod
sa Espiritu sa kinabuhi alang sa Lawas ni Cristo sa tumong nga himoon
tang Dios sa kinabuhi, kinaiya, ug pagpadayag apan dili sa ranggo
sa pagka-Dios aron mahuman ang tumong sa walay kataposang
pamatigayon Niya—ang Bag-ong Jerusalem.**

**Makasinati tang tanan sa diosnong pagpaambit
sa Diosnong Trinidad sa pagginhawa nato sa Espiritu,
sa balaang gininhawa, pag-inom sa mao ra nga espirituhanong ilimnon,
ni Cristo nga malangkobon-sa-tanan nga Espiritung taghatag-og-kinabuhi,
ug pagkaon ni Cristo nga tinapay sa Dios—
ang tinuod nga tinapay, ang langitnong tinapay, ang tinapay sa kinabuhi,
ug ang buhing tinapay—ug maumol Niya aron magpadayag Niya
ug morepresentar Niya.**

**Isip mga magtutuo ni Cristo, mahigugma lang ta sa Ginoo
ug kanunayng mobukas sa atong kaugalingon Kaniya,
hatagan Siya sa tanang higayon nga makabuhat sa tanang gusto
Niyang buhaton, ug matagbaw sa kinabuhi sa ordinaryong mga adlaw
sa kasagaran ug normal nga mga kasinatian
diha sa diosnong pagpaambit sa Diosnong Trinidad
sumala sa milagrosong pagkanormal
sa diosnong pamatigayon.**

**Matod pa sa tibuok pinadayag
sa kan-uman ug unom ka basahon sa Biblia,
ang Diosnong Trinidad—ang Amahan, ang Anak, ug ang Espiritu—
alang man sa pagpaambit sa Dios, sa ato pa,
sa pag-apod-apod sa Dios nganha sa Iyang piniling katawhan;
tulo-usa ang Dios aron makapaambit Siya sa Iyang Kaugalingon kanato,
makaumol sa Iyang Kaugalingon kanato,
aron mapahimuslan nato para matukod ta nga Lawas ni Cristo
ug maandam nga mapangasaw-onon ni Cristo
alang sa ikaduhang pag-anhi Niya sa mahimo nang gingharian
sa atong Ginoo ug sa Iyang Cristo ang gingharian sa kalibotan
nga harian Niya hangtod sa kahangtoran.**

**Talamdan sa Mga Mensahe
alang sa Thanksgiving Conference
Nobyembre 24-27, 2022**

**LINANGKOB NGA HISGOTANAN:
ANG DIOSNONG PAGPAAMBIT SA DIOSNONG TRINIDAD
ALANG SA DIOSNONG PAMATIGAYON**

Mensahe 1

**Ang Walay Kataposang Panalangin sa Tulo-usang Dios
pinaagi sa Diosnong Pagpaambit sa Diosnong Trinidad
nganhi Nato aron Mahuman ang Diosnong Pamatigayon Niya**

Basahong Kasulatan: Num. 6:22-27; 2 Cor. 13:14; Bug. 22:1-2

- I. Sa tibuok uniberso ang bugtong-talagsaong panalangin mao ang Tulo-usang Dios, ug modangat kanato kining panalangina pinaagi sa diosnong pagpaambit sa Diosnong Trinidad nganhi nato aron atong mapahimuslan aron mahuman ang diosnong pamatigayon Niya:**
- A. Ang walay kataposang pamatigayon sa Dios mao ang administrasyon Niya sa panimalay nga ipaambit ang Iyang Kaugalingon diha ni Cristo ngadto sa piniling katawhan Niya aron makabaton Siyag balay nga magpadayag Niya, ug kining balaya mao ang iglesia, ang Lawas ni Cristo; ang walay kataposang pamatigayon sa Dios mao ang walay kataposang plano Niya, ug ang diosnong pagpaambit Niya maoy palagianan nga mabuhay Niya ang Iyang plano—1 Tim. 1:3-4; 3:15; Rom. 12:5; Efe. 1:10; 3:8-9; 2:10.
 - B. Tungod sa diosnong pagpaambit sa Dios mahimong Dios ang mga magtutuo, mahimo silang Dios sa kinabuhi ug kinaiya apan dili sa ranggo sa pagka-Dios, aron matukod ang iglesia nga Lawas ni Cristo ug maandam ang pangasaw-onon ni Cristo nga magpadangat sa Iyang gingharian; alang ning tuyoa nahimong tawo ang Dios aron “himoong tawo” ang Iyang Kaugalingon; unya gipaambit Niya kanato ang Iyang Kaugalingon ingon nga kinabuhi aron “himoong [tang] Dios.”
 - C. Ang tuyo sa Dios sa Iyang pamatigayon pagpaambit man sa Iyang Kaugalingon diha sa Iyang Diosnong Trinidad—ang Amahan, ang Anak, ug ang Espiritu—nganha sa piniling katawhan Niya; ang bugtong tumong sa Dios sa panahon pagpaambit man sa Iyang Kaugalingon kanato adlaw-adlaw.
- II. Makita nato sa Numeros 6:22-27 ang sumbanan sa pagpanalangin sa mga sacerdote; dili panalangin sa Daang Tugon o panalangin ba sa Bag-ong Tugon kining panalangina; walay kataposang panalangin hinuon kini sa Tulo-usang Dios, nga mao ang Tulo-usang Dios nga nagpaambit sa Iyang Kaugalingon diha sa Iyang Diosnong Trinidad nganhi nato aron atong mapahimuslan:**
- A. Mahimong ipahinungod nato sa Amahan ang “magpanalangin ug mag-amping si Jehova kanimo”—v. 24:
 - 1. Panalanginan ta sa Amahan sa tanang bahin ug sa tanang aspeto diha sa Iyang gugma (itandi sa Efe. 1:3), ug ampingan ta Niya sa tanang bahin ug sa tanang aspeto diha sa Iyang gahom (itandi sa Juan 17:11, 15).
 - 2. Nag-ampo ang Ginoo nga ampingan ta sa Amahan diha sa Iyang ngalan (v. 11); pag-amping kini kanato diha sa nagpaambit nga Tulo-usang Dios;

niampo pa gyod si Ginoong Jesus nga ampingan unta ta sa Amahan gikan sa daotan (v. 15).

3. Mag-ampo gyod ta alang sa panalangin nga bug-os nga maampingan diha sa pagpaambit sa Tulo-usang Dios ug hingpit nga mahigawas sa daotan; unsa nga panalangin kini!
- B. Mahimong ipahinungod nato sa Anak ang “pasidlakon ni Jehova ang Iyang nawong nganha nimo ug magmagrasyahon nimo”—Num. 6:25:
1. Sa Lucas 1:78, sa hapit na ipanganak si Ginoong Jesus, nanagna si Zacarias nga, “Moduaw nato gikan sa itaas ang nisilang nga Adlaw”; ang nisilang nga Adlaw mao ang Anak diha sa Diosnong Trinidad; nagpasabot kini sa pagpakatawo sa Dios aron masidlakong ipakita ang Iyang Kaugalingon kanato—Mat. 4:16; Juan 8:12.
 2. Nagtimaan og presensya ang pulong *nawong* sa Numeros 6:25; kay Iyaha mang nawong ang mosidlak kanato, si Cristo nga Anak mao ang makitang presensya sa dili makita nga Dios—2 Ped. 1:16-18; Mat. 17:1-2.
 3. Naghisgot ang Numeros 6:25 dili lang ni Jehova nga nagpasidlak sa Iyang nawong kanato kondili ni Jehova sab nga nagmagrasyahon kanato; kon tapoon kining duha ka punto pareho ra kini sa Juan 1:14, 16-17.
 4. Ang pagpakatawo sa Dios mao ang pagsidlak sa Iyang presensya, ug uban ning pagsidlaka naay grasya; kining grasyaha mao ang grasya ni Ginoong Jesucristo, nga sa pagkatinuod mao si Cristo mismo—2 Cor. 13:14.
- C. Mahimong ipahinungod nato sa Espiritu ang “iisa ni Jehova ang Iyang panagway kanimo ug hatagan kag kalinaw”—Num. 6:26:
1. Nagpasabot ang nawong sa presensya sa tawo, ug nagpasabot ang panagway sa ekspresyon nianang tawhana; ang pag-isa sa imong panagway nganha sa usa ka tawo nagpasabot nga gipamatud-an, gipasaligan, gisaaran, ug gihatagan nimo sa imong tanan kanang tawhana.
 2. Nianhi si Jesus ingon nga nawong sa Dios, ug moabot ang Espiritu Santo ingon nga panagway sa Dios; kon paguolon nato Siya, masubo ang Iyang panagway (Efe. 4:30), apan kon mosugot ta Niya, malipay Siya nato, ug iisa Niya ang Iyang panagway aron pamatud-an, pasaligan, garantiyahan, saaran, ug hatagan ta sa tanan.

III. Ang panalangin sa 2 Corinto 13:14 pareho ra sa panalangin sa Numeros 6:22-27; kini ang walay kataposang panalangin sa Tulo-usang Dios, nga mao ang Tulo-usang Dios nga nagpaambit sa Iyang Kaugalingon diha sa Iyang Diosnong Trinidad nganhi nato aron mapahimuslan nato—“mag-uban ninyong tanan ang grasya ni Ginoong Jesucristo ug ang gugma sa Dios ug ang pakig-ambitay sa Espiritu Santo”:

- A. Ang “magpanalangin ug mag-amping si Jehova kanimo” mao ang gugma sa Dios Amahan nga tuboran sa kinabuhi ug kahayag—v. 24; Sal. 36:8-9.
- B. Ang “pasidlakon ni Jehova ang Iyang nawong nganha nimo ug magmagrasyahon nimo” mao ang grasya ni Cristo nga katambok sa balay sa Dios—Num. 6:25.
- C. Ang “iisa ni Jehova ang Iyang panagway kanimo ug hatagan kag kalinaw” mao ang pakig-ambitay sa Espiritu Santo nga suba sa mga kalipay sa Dios—v. 26.

IV. Ang grasya sa Ginoo mao ang Ginoo mismo nga kinabuhi nato aron atong mapahimuslan (Juan 1:17; 1 Cor. 15:10), ang gugma sa Dios mao ang Dios mismo (1 Juan 4:8, 16) nga tinubdan sa grasya sa Ginoo, ug ang pakig-ambitay sa Espiritu mao ang Espiritu mismo nga pagpalatay sa grasya sa Ginoo uban sa gugma sa Dios nga atong maapilan—2 Cor. 13:14:

- A. Unang gihisgotan sa 2 Corinto 13:14 ang grasya sa Ginoo kay kalabot man sa grasya ni Cristo kining basahona—1:12; 4:15; 6:1; 8:1, 9; 9:8, 14; 12:9.
- B. Ang Espiritu Santo nga pagsirkular, pagpalatay, sa grasya ni Cristo uban sa gugma sa Amahan mao ang sangkap sa atong Cristohanong kinabuhi ug iglesiahonong kinabuhi:
 - 1. Nag-agad sa 2 Corinto 13:14 ang tibuok iglesiahonong kinabuhi.
 - 2. Ang sulog sa Diosnong Trinidad sa sulod nato nga gipadayag sa 2 Corinto 13:14 mao ang espirituhanong pulso nato.
- C. Sa pagpanalangin ni apostol Pablo sa 2 Corinto 13:14, nidangat ang Tulo-usang Dios sa mga tawo aron ilang mapahimuslan; dili lang nga gidala ni Pablo ang mga tawo sa presensya sa Dios kondili gidala sab ang Dios kanila:
 - 1. Sa usa ka bahin, ang pagpanalangin sa uban pagdala man kanila sa presensya sa Dios; sa laing bahin, pagdala kini sa Dios kanila ingon nga gugma, grasya, ug pakig-ambitay aron mapahimuslan nila ang Tulo-usang Dios—ang Amahan, ang Anak, ug ang Espiritu.
 - 2. Ang gugma, grasya, ug pakig-ambitay tulo ka hugna sa Dios aron atong mapahimuslan—naa sa sulod ang gugma, ang grasya mao ang gugmang napadayag, ug ang pakig-ambitay mao ang pagpalatay sa grasya nganhi nato.
 - 3. Ang gugma sa Dios maoy tinubdan, kay ang Dios may gigikanan; ang grasya sa Ginoo maoy agayanan sa gugma sa Dios, kay ang Ginoo may pagpadayag sa Dios; ug ang pakig-ambitay sa Espiritu mao ang pagpaambit sa grasya sa Ginoo uban sa gugma sa Dios aron atong masinati ug mapahimuslan ang Tulo-usang Dios—ang Amahan, Anak, ug Espiritu Santo, lakip ang diosnong maayong kagawian Nila.
 - 4. Dili alang sa pagtuon sa teolohiya ang diosnong pinadayag sa Diosnong Trinidad sa Dios diha sa balaang Pulong; para hinuon kini makasabot ta giunsa pagpaambit sa Dios diha sa misteryoso ug kahibulongang Diosnong Trinidad Niya ang Iyang Kaugalingon nganha sa Iyang piniling katawhan, aron kitang pinili ug tinubos nga katawhan Niya, ingon sa gipakita sa panalangin sa apostol sa Corintohanong mga magtutuo, makaapil, makasinati, makapahimulos, ug makabaton sa nahikay nga Tulo-usang Dios karon ug hangtod sa eternidad; makapahimulos ug mapanalanginan gyod unta ta sa nahikay ug nagsirkular sa sulod nga Tulo-usang Dios adlaw-adlaw aron ikapaambit nato Siya sa uban isip bugtong-talagsaong panalangin sa uniberso aron matuman ang gitinguha sa kasingkasing sa Dios nga mabatonan ang panghimatuod ni Jesus, ang hiniusang pagpadayag ni Jesus—v. 14; Gal. 3:14; Gen. 12:2; Fil. 1:25; Bug. 1:2, 9-12.

V. Sa Bag-ong Jerusalem dunay “suba sa tubig sa kinabuhi, tin-aw sama sa kristal, nga nag-agay gikan sa trono sa Dios ug sa Cordero...Ug ning daplina ug sa pikas daplin sa suba naa ang kahoy sa kinabuhi”—22:1-2a:

- A. Sa eternidad ang Dios mismo nga naglingkod sa trono mao ang Cordero-Dios, ang atong Dios nga nagtubos, ug gikan sa Iyang trono nag-agay ang suba sa tubig sa kinabuhi ubay sa kahoy sa kinabuhi nga mosangkap ug motagbaw nato.
- B. Mohayag ang Cordero nga suga pinaagi sa Dios nga kahayag aron dan-agan ang syudad sa himaya sa Dios, nga pagpadayag sa diosnong kahayag—21:23; 22:5.
- C. Ang Tulo-usang Dios—ang Dios, ang Cordero, ug ang Espiritu, nga gisimbolohan sa tubig sa kinabuhi—nagpaambit sa Iyang Kaugalingon nganha sa Iyang mga tinubos ubos sa Iyang pagkaulo (gipasabot sa pagbulot-an sa trono) sa eternidad.
- D. Lunsayng bulawan ang dalan sa Bag-ong Jerusalem (21:21), ug nag-agay ang

suba sa tubig sa kinabuhi sa kinatung-an sa dalan niini (22:1); kay nagsimbolo man sa diosnong kinaiya sa Dios ang bulawan, makita nato nga nag-agay ang diosnong kinabuhi diha sa diosnong kinaiya isip bugtong-talagsaong paagi sa adlaw-adlawng kinabuhi sa tinubos nga katawhan sa Dios.

E. Isip kahingpitan sa tibuok rekord sa Biblia, ang Bag-ong Jerusalem mao ang Dios mismo diha sa Iyang Diosnong Trinidad—sa Amahan, sa Anak, ug sa Espiritu—nga nausa, nasagol, ug natagik sa pinili, tinubos, gipanganak pag-usab, gitransporma, ug gihimayang katawhan Niya isip walay kataposang panalangin nila; kanang panalangina ang kinahingpitang katumanan sa panalangin sa Dios sa Israel sa Numeros 6—itandi sa Bug. 21:3, 12, 14, 22; 22:1-2.

VI. “Usahay kon hunahunaon nato ang atong sitwasyon, mahigawad tingali ta ug bation nato nga wala tay nahot. Morag alang nato kakawangan sa mga kakawangan ang tanang butang silong sa Adlaw ug bisan ngani ang tanang butang sa espirituhanong ginsakpan. Bation tingali nato nga walay tinuod, bisan ngani sa iglesiahanong kinabuhi. Unsa may buhaton nato kon mobati tag ingon niini? Moliso gyod ta sa Tulo-usang Dios. Siya ang tinuod nga panalangin ug pahat nato. Unsa nga panalangin kanang maato Siya isip panalangin! Unsa nga panalangin kanang naa nato ang Iyang nawong, Iyang presensya, ug makapahimulos ta Niya nga grasya adlaw-adlaw! Labi tang mag-antos, labi sab tang makapahimulos Niya nga grasya. Unsa nga panalangin kanang pahiyoman, pasaligan, ug pamatud-an ta sa Iyang panagway! Ug unsa nga panalangin kanang magmalinawon ta diha Niya, pinaagi Niya, ug uban Niya! Ang Tulo-usang Dios kini nga panalangin nato. Oh, mag-uban unta ninyong tanan ang grasya ni Cristo, ang gugma sa Dios, ug ang pakig-ambitay sa Espiritu Santo!”—*Life-study of Numbers*, p. 83.